

Hauptsach, de Iwwergong iss rechtwinklich

Gude Fritz. Ei wie dann? Giehts de Thea widder besser?

Gude Heini, ja, alles in Ordnung. Ich denk, mir sehn uns bald widder mol. Was hosden uffem Herze?

Du Fritz, mir hawwe in Flerschem e Problem mett dene Richtungspfeile uff de Bohnhofstrooß – waaßde mett dere leicht abknickende Vorfahrt in die Edderschemerstrooß – du kennst den Fall. Der oone Pfeil ...

Enn Aacheblig, Heini, ich holl merr grad emol de Plon. So, do isser. Was hosde ferr Problem mette Pfeile?

Fritz - der ferr de Verkehr nooch links in die Bohnhofstrooß iss joo in Ordnung. Awwer der ferr die Kurv in die Edderschemerstrooß misst doch den Booche nooch rechts darstelle, odder lieh ich doo falsch? Awwer nooch Plon zeicht der gradaus direkt in die Riedstrooß. Wenn doo enn fremde Fahrer irritiert werrd, nor e bissi brems, weiler zu spät merkt dass die Strooß nooch rechts abknickt, kann schunn ooner, der sich auskennt unn mett Schmackes hinnerhergefahrr iss, uff de fremde Vordermonn uffgefahrr soi. Wer hotten den Plon mette Pfeile gemacht?

Ei die Ramona. Unn de Alde hotten abgezeichend. Was willsden jetzt mache, Heini?

Fritz, ich deet omm liebsde den Pfeil im Radius mache, so wie die Strooß laafe dut.

Wart emol, Heini, mir messe dess aus – der Radius iss dreiunnfuffsisch Meter. Doo nimmsde e Kordel ...

Fritz, ich kann mettere Kordel unn emm Stick Kreide so koon große Radius mache, hinner mir iss koo Feld, doo sinn Häuser. Mir kennde mett de Hond ...

Um Gotteswille, Heini, unsern Alde nimmt enn hondgemolte Pfeil nie ab, den derrfsde dann uff Kosde von unserne Abteilung widder wegmache, naa, naa. Also, die Ramona gieht sofort droo unn gibt derr die Messpunkte dorsch, die molsde uff unn dann konnsde den Pfeil mache. Awwer ich heer unsern Alde schunn widder vumm Bär ...

... unn vumm Indianer redde, jaja. Enn Aacheblig, Fritz, de Jussuf will was vunn merr ...

Jussuf, was iss? Okee, Jussuf, dann room ab. Fritz, bisde noch droo? Grad sacht merr de Jussuf, dass de Ali den grade Pfeil im Aacheblig ferrdisch gemacht hott – genau nooch Plon unn gradaus.

No ja, Heini, doo hott sich die Sach joo erledischd – wart emol, Heini, unsern Al... Albert, de Herr Schmidt, iss grad ins Zimmer kumme, dem konnsde dess grad saache.

Tach Herr Schmidt, ich hätt ...

Sie sind mit den Markierungen schon fertig? Gute, schnelle Arbeit, Herr Keller. Prima.

Herr Schmidt, ich hätt' nur gern den eine Pfeil im Booche gemacht, so wie die Straß' dort verläuft.

Herr Keller, Sie kennen meine Ansicht: Krumme Pfeile gibt es nicht! Stellen Sie sich vor, ein Indianer würde mit einem krummen Pfeil auf einen Bären schießen! Das wäre das Ende vom ... ja richtig, vom Indianer. Übrigens – ist der Übergang vom Schaft zur Pfeilspitze rechtwinklig, hat die Spitze genau fünfzehn Grad? Sie wissen, dass ich darauf großen Wert lege. Morgen werde ich mir Ihre Arbeit ansehen. Auf Wiederhören, Herr Keller. Ich gebe Ihnen noch mal den Fritz Meier.

Heini? – alles klar? Kimmsde omm Somsdaach zu de Keescheler uff de Grillplatz?

Naa, Fritz, die Dochder hott Gebortsdaach. Mir sehn uns e onnermol, machs gut.

(Dess Telefongespräch hott mitgeheert:) Eiern Honnes